



Aasiaat 12. januar 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara.

### **Naalakkersuisunut apeqquut:**

#### **1. Innuttaasut pisortanut akiitsui 2017 tikillugu qanoq amerlatigippat?**

- a. Taakkunannga akileraarutissaagaluartunit akiitsut qanoq amerlatigippat?**
- b. Taakkunannga meeqqanut akilersuutissanut akiitsut qanoq amerlatigippat?**
- c. Akileraarutissaagaluartunit akiitsut ukiunik tallimanik pisoqaanerusut qanoq amerlatigippat? (2013-imiit tassanngalu pisoqaanerusut)**
- d. Meeqqanut akilersuutissaagaluartunit akiitsunit ukiunik tallimanik pisoqaanerusut qanoq amerlatigippat? (2013-imiit tassanngalu pisoqaanerusut)**

#### **2. Pisortanut akiitsuulersimasunik isumakkeerinnittarneq atuuppa?**

(Inatsisartuni ilaasortaq Peter Olsen, Inuit Ataqatigiit)

### **Tungavilersuut:**

Ukiuni kingullerni arlaqalersuni innuttaasut pisortanut akiitsui 1.mia. aamma 800 mio.kr. missaata akornanni amerlassuseqartuarsimapput.

Innuttaasut taama amerlatigisunik pisortanut akiitsoqalersimanerat ingasappoq, tamannalu akuersaarneqarsinnaanngilaq. Aningaasarpasuppup, suliniutinut pitsaasunut pingaarutilinnullu assigiinngitsorpassuarnullu atorneqarsinnaagaluartut, taamaattorli annaasaqaatigiinnartak-kavut.

Innuttaasup kialluunniit minnerusumik annerusumilluunniit nammineq pisuussutigaa akissusaaffigaalu pisortanut akiitsoqalersimanini. Akiitsut akilerneqartariaqarput qimarratigine-qassanngillallu. Akiitsulik kinaluunniit periarfissaatillugu, piffissaatillugulu killissaa tikillugu akiligassaanik akiliisinniarneqartariaqarpoq. Kisianni aamma taamatut oqariarlunga...

Taamaakkaluartoq ukiuni kingullerni nalunngilarput, misilittakkallu takutippaat akiitsunik ukiunik tallimanik pisoqaanerusunik akiliisitsiniartarneq ajornakusoorluinnaqqissaartoq, immaqalu allaat piffissaajaataannartut oqaatigineqarsinnaalluni.

Pisortanut akiitsut millisarniarlugit iliuseqartariaqaleratta Naalakkersuisumut apeqquutit annguppakka.

Qinnutigissavara apeqquuteqaatima ullut suliffiusut qulit iluanni akineqarumaartut.